

Jangan Terperangkap Politik Kebencian Pihak Tertentu - Anggota Parlimen Kudat Bernama
15 Januari, 2012

KOTA KINABALU, 15 Jan (Bernama) -- Anggota Parlimen Kudat Datuk Abdul Rahim Bakri hari ini mengingatkan rakyat supaya tidak terperangkap dengan politik kebencian yang dimainkan oleh pihak-pihak tertentu tanpa memikirkan akibatnya yang boleh mengganggu gugat keharmonian masyarakat khususnya menjelang pilihan raya umum.

Semua pihak seharusnya sentiasa bertanggungjawab memelihara keharmonian di antara masyarakat bagi menjamin negara sentiasa aman, menikmati pembangunan serta kemakmuran yang mapan dan berterusan, katanya dalam satu kenyataan bagi mengucapkan selamat menyambut Tahun Baru Cina kepada masyarakat Tionghua. Tahun Baru Cina akan disambut pada 23 Jan.

Beliau yang juga Timbalan Menteri Pengangkutan berkata tanggungjawab ini perlu dipikul bersama dan menuntut pengorbanan dan keprihatinan semua pihak.

"Negara adalah diibaratkan sebagai sebuah keluarga besar dan bagi mewujudkan keluarga yang bahagia dan stabil ia perlu ada penghormatan dan kepatuhan kepada etika serta tatasusila perhubungan yang baik dan dipatuhi oleh semua pihak," katanya.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=640170>